



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 8

Yangia anidakangma :



Tir Yimiyim



tir_yimiyim



tir yimiyim

TAPAK 3

Morocco captain Saiss internasional asaya nungi anisungziker

Maoist lenir Devuji bendanga agütsüogo



VOL. XXIII ISSUE NO. 133 (ADOK 133) DIMAPUR RASEMNÜ (WEDNESDAY) TSÜKLAI (FEBRUARY) 25, 2026 ₹ 5.00

Bendangertemi Protected Area Permit meshitsüla



Dimapur, February 24, 2026 (TYO): Nagaland semdangi aruba bendangertemi Protected Area Permit (PAP) meshitsüla ta Commissioner of Police, Dimapur-i nenshia metetdaksüogo.

Aiben iba indang osang sangdongaka aser media sabang balala nung prokshiaka bendangertemi PAP magizüki Nagaland telungi aiter aser iba ya telatetba alema lir ta Commissioner of Police-cum-Foreigners Registration Officer (FRO), Dimapur-i sangdong ka nung ashi.

Ministry of Home Affairs (MHA)-i December 17, 2024 nü Nagaland nungi Foreigners (Protected Areas) Order, 1958 agienba metetdaksüogo. Iba ajanga bendangertem (foreigners) ajaki state telungi maitdang bangdakpur ket nungi Protected Area Permit meshitsüla ta CP Dimapur-i ashi.

Ministry of Home Affairs, bendanglen aliba Indian Missions, Foreigners Regional Registration Offices (FRROs), Nagaland, Kohima nung Home Commissioner, New Delhi nung

Nagaland Resident Commissioner aser Secretary (Tourism), Government of Nagaland, Kohima nungi PAP meshitsü akok.

Afghanistan, China, aser Pakistan sensotem den item linüktem nungi bendangertemi Nagaland semdangi marudang tamasa Ministry of Home Affairs nung temelaba meshitsüla. Maneni, Myanmar sensotemia PAP atema Ministry dang nungi temelaba agitsüla ta Commissioner of Police-cum-Foreigners Registration Officer Aotula T. Imchen, IPS-isa sangdong nung shia lir.

Nagaland-i aruba bendanger ajaki parnok tonga arur ghonda 24 tsungda bangdak district nung Foreigners Registration Officer den register asütsüla ta laisa ashi.

Dimapur police-i public, organisations, government departments, travel agents, tour operators, hotels, guest houses, homestays, paying guest facilities, aser bendangertem anenzükdaksüba telok ajak dang PAP tetuyuba sülen anidaksü metetdaksüogo.

Manipur CM-i PM Modi den ajurutep

Imphal, February 24, 2026 (Agencies): Mongulbarnü Prime Minister Narendra Modi-i Manipur Chief Minister Yumnam Khemchand Singh aser Deputy Chief Minister ana den ajurutepa senden ka menogo.

CM Khemchand den Deputy Chief Minister ana- Nemcha Kipgen (BJP) aser Losii Dikho (Naga People's Front) nati PM Modi den ajurutep. Kipgen ya Manipur nung mezüngbuba tetsür Deputy Chief Minister lir.

February 4 nü Khemchand Singh-i Chief Minister inyaksü tenzükba sülen tang mezüng atema PM Modi den ajurutepogo ta Manipur CM Secretariat ajanga metetdaksü.

Senden nung CM Khemchand-i state sorkar tasen ajanga Manipur nung yimjung aser teputep adoktsü atema mapatem inyakba lemsatep.

Paisa Prime Minister dang Manipur aser northeastern

region nung terenlok asoshi temulung balaka agütsütsü ayongzük.

Paisa Manipur kübok hill aser valley district tem nung tetsürtem tashi itdaksütsü atema temulung agütsütsü mepishi.

Khemchand Singh aser Deputy Chief Minister nati Prime Minister Modi dang Manipur semdangtsü atema pelashishia jaok.

Hombarnü Chief Minister Khemchand-i New Delhi nung Union Minister for Development of North Eastern Region (DoNER) Jyotiraditya M. Scindia den ajurutepa senden ka menogo.

Senden nung Scindia-i CM Khemchand dang DoNER Ministry ajanga Manipur nung polo project ka asoshi senotsü teyari agütsüba lemsatep.

Paisa Khemchand dang DoNER Ministry-i tanga central ministries den Manipur asoshi amalitepa yaritepsü nangzük.

CNCCI-i municipal tolls akangakanga noktangtsü akhanger

Dimapur, February 24, 2026 (TYO): Department of Municipal Affairs-i Municipal aser Town Council ajak dang tolls, urban utility taxes, vehicle entry fees aser ite mesükba sen mesarutsü tetuyuba agütsüba pelashishia agizüker ta Confederation of Nagaland Chamber of Commerce & Industry (CNCCI)-i metetdaksüogo.

Tesüiba nunga mapa akanga meinyakba ajuruogo aser ozüng alema sen saruba ya manenra onoki ozüngi melaba ama iba anema mapa inyaksü ta CNCCI-i ashi.

Ozüngi memelaba check gates aser sen saruba anema CNCCI-i Nagaland ajungalen dokantem shibanger lungkak ait aser iba sülen state sorkari Deputy Chief Minister Yanthungo Patton lenisüba kübok luden ka tenteta liasü ta parnoki sangdong ka nung ashi.

Külen, Municipal Affairs Department-i November 16, 2021 nü sangdong ka nung "GST

kübok adenba items/goods nung taxes/fees agiba Nagaland state nung Municipal aser Town Councils ajaki anentsüla" ta tetuyuba agütsüogo.

Ajisüaka municipal aser town councils aikati 2021 tetuyuba sülen manidaker aser sen sarutsü tenzük. Iba ajanga parnoki sorkar tashi aser deputy chief minister lenisüba kübok luden metsübuba sayu ta CNCCI-isa metetdaksü.

CNCCI-isa Nagaland ajungalen shishilembabaren shibanger lungkak aittsü tenzük aser iba ajanga Home Department-i May 19, 2022 nü sangdong ka agütsü. Iba nung inter-state police check gates dak alaka check gates ajak shibangtsü tetuyuba agütsü aser tashi mangartem IPC nung Sections 188 aser 384 kübok merenshitsu metetdaksü.

May 19, 2022 tetuyuba ajanga khen atema anisungzük angu saka sorkar department kar, municipal councils aser town

councils-i iba tetuyuba alema inyaksü tenzük. Iba amai sorkar tetuyubatem magizükba ajanga Nagaland nung ozüng sülen anidakba nung ashishitep ken o tem adoker ta CNCCI-isa metetdaksü.

February 23, 2026 nü tetuyuba agütsüba pelashishia agizüker saka mapa küma inyaka aotsü asü masü ta arentaka bilemer. Külen, November 16, 2021 aser May 19, 2022 tetuyubatem mapa küma inyaksüla aser Home Department-ia May 19, 2022 tetuyuba akangakanga beshitsüla kechiyong sorkar department kari gate balala nung sen sarutsü tenzükogo ta CNCCI-isa ashi.

Nagaland nung ozüngi memelaba tolls mesüra fees saruba magizüktsü aser consumers o shishilembartem kümzüka ayutsü atema onoki ozüngi melaba ama mapatem inyaksü nungnanga mali ta CNCCI-isa metetdaksüogo.

Gorakhpur nung Naga doctor dak tim masüba inyaker 2 apu

Guwahati, February 24, 2026 (Agencies): Uttar Pradesh kübok Gorakhpur nung All India Institute of Medical Sciences (AIIMS) nung tetsür doctor ka kin nung rangloker amakba ken o dak sendakba nung nisung ana puogo.

Tetsürta ya obstetrics & gynaecology nung resident doctor ka lir aser February 22 nikonngang mall nungi meyipa aodang tai tonglokja alirtemi

kilometer ka tema la sülen anidak ta tai tonglokja lir.

Nisungtem jagi kin nung ajemdaker la mezüngmeshi aser AIIMS gate anasa la dak tim mesüi kongshi ta ashir.

Police-i apuba nisung anaji Suraj Gupta aser Amrit Vishwakarma na ta jangjaogo aser tenaprong Deoria district nung alir.

Tai tonglokja alir nisung asem rongnungi ana puogo aser

tasembuba aputsü merangdar ta police-i ashi.

National Federation of Resident Doctors (NFORd)-ia iba tatalokba khukhua aitsüogo. Iba ajanga resident doctor kanga aoksaogo, maaksüogo aser timtemogo ta parnoki metetdaksü.

Nisungtem jagi la Northeast tsür asüba nung rangloker mezüngmeshi ta NFORd-isa ashi.

NMSA-i Naga doctor atema temeten meshir

Dimapur, February 24, 2026 (TYO): All India Institute of Medical Sciences Gorakhpur nung postgraduate azünger Naga doctor mezüngmeshiba aser tim mesüi kongshiba khukhua aitsür ta Nagaland Medical Students' Association (NMSA)-i sangdong ka nung ashi.

Naga doctor ya Obstetrics and Gynaecology nung third-year postgraduate resident lir aser aonung 8:00 ako meta la campus-i meyipa aodang nisung aseme la sülen kilometer 1.5 shi anidak ta NMSA-i ashi.

Parnoki kin nung ajemdaker la mezüngmeshi aser tim mesüi kongshi aser iba ajanga la temang aser tekolok nung timtem ajuruogo. Academic aser healthcare environment ka nung iba ya atalokba atema temulung mesüngjemeteter aser magizüker ta NMSA-isa metetdaksüogo.

Iba tatalokba ajanga North Eastern region nungi nisungtemi timtem balala ajuruba nenshir. Kin nung ajemdaker mezüngmeshiba aser tim mesüi kongshiba tatalokba asoshi 'zero tolerance' asütsüla aser aibelenertem ozüng tapet agi merenshitsu akhanger ta parnokisa ashi.

"Police-i nisung asem rongnungi ana apuba atema pelar saka ka ano pua maruba atema tebilemstü abener. Tai tonglokja alir ajak pua maru tashi timtem ajururi temeten mangutsü aser tali shisabulutsü" ta NMSA-isa metetdaksüogo.

Parnokisa Nagaland sorkar dang Uttar Pradesh aser bangdak central authorities den iba ken o lemsatepsü atema mepishiogo.

Naga doctor-i tetsübu melii aser tetsükdaksü kecha majurui temeten bushitsu atema la nem teyari agüjang ta NMSA-isa ashi.

Maneni, National People's

Youth Front (NPYF), Nagaland State Unit-ia linük nung Northeastern region nungi tetsürtem dak tenük yoka tim masüba mapa inyakba aser mezüngmeshiba aitsüogo.

NPYF-i educational aser medical rejutem nung security maparen akangshitsu aser ozüng akangakanga beshitsü takhangba agütsüogo.

Linük nung yimti tulutem nung Northeastern sensotem khuret lemsatepsü aser kümzüka ayutsü inyakyim tenzüktsü atema parnokisa takhangba agütsü.

Centre sorkar aser bangdak state sorkartemi item tatalokbatem süoki ia bilemstü aser tarutsü nung ibala mataloktsü atema tim mapa inyaksü ayongzüker. Tetsürtem aser Northeastern nunger kümzüka ayutsüba nung tatemzükba kecha malitsüla ta NPYF-isa metetdaksüogo.

Nüburtemi tamang katettsüsa school system yanglushitar: Yhome



Kohima, Tsüklai/February 24 (TYO): Nüburtemi tanaben tamang katettsüsa aser standards tajungba kumdaktsütsü atema Department of School Education-i government schools tem ketdangsüba aser inyakyim kanga sashia yanglushiba mapang lir, ta Advisor, School Education & SCERT, Dr. Kekhrielhoulie Yhome-i Mongulbarnü ashi.

New Secretariat nung Government High School, Phezoucha upgradation aser school ki tasen semzüksüba sentong nung jembidang, education sector nung timtem zünger mezüngmai lir, aser system nung tai kecha mali, saka ketdangsüba aruba nung technical aibelen lir, ta Dr. Yhome-i ashi.

Government school tem nung tebilemsü teti aliba ya shidak ta pai ashi aser stakeholders temi department den yaritepa tebilemsü lemsatepba aser lungjemer lenmang bushiba atema pelaba lemsatepa liasü.

Government school system yangershitsü aser 'rebrand' asütsü atema tongtipang tongshi asem indang pai lemsatepa liasü.

"School indag ki o jen tajungba kumdaktsütsü ya tongtipangtiba teinyaktsü lir, ajisüaka senotsü peria mali

asünung terenlok kanga kera masütsü. Ki o jen, compounds aser facilities uprade asütsü tongtipang lir," ta pai ashi.

Tanabuba tongshi ya administrative temelenshi ajanga ketdangsüba nung tashi itshitsüba nung rangloker. Item nungji tajungba nung nübu ketdangsüba, tesayur attendance mitba, field coordination tajungba kumdaktsüba aser school tem loktepdaktsüba dena lir. Iba amala mera ya agi tenzükogo, ta pai ashi.

Tongtipangtiba tongshiji private aser government school tem ketdangsütsü asoshi Nagaland School Standards Authority tetetba ya lir, ta Dr. Yhome-i ashi.

Third-party partners aser CSR networks den lungjemer department-i curriculum tajungba kumdaktsütsü, micro-level interventions tenzüksü aser 'overall learning outcomes' tajungba kumdaktsütsü nükjidong lir, ta ashi.

Standardisation ajanga government schools tem tenüng melenshiba nung yaria kaketshir timba atsür arutsü.

Government school tem ya makamaiter azüngba reju ama aiben angateter aser private school tem tajungba amai lir, ta pai ashi.

Tesayur takotet liaka government school tem nung enrolment kanga ajema lir, ta pai ashi.

"Dangar ama mekumteter tem government school-i aor ta nüburtem nem bilemdaktsütsü kumogo, koba shidak masü," ta pai ashi aser küm ishika tsüngta state toppers tem government school nungi adokba indanga lemsatepa liasü.

Senotsü tsütsü timtem liaka tsürabor aikati sen apua mesüra ali kimong yokshia pei tanurtem private school nung züngdaktsür, koba pei tanur nem tajungtiba agütsütsü tejangraba nung inyaker.

Tang department-i urban aser rural school tem atema tasa balala yanglutar, ta Advisor-i ashi.

Dangar jakdang aliba linük aika nung government school system ya alima nung tajungtiba rongnung dena lir, aser kasaji Nagaland nunga melenshia takok ngutetsü nükla lir.

Pai kaketshir tem dang tematiba jenjang asoshi meranga azüngtsü ayongzük aser küm shia ki o jen, ketdangsüba aser standards tajungba akumba angutsü ta ashi.

Iba sentong nung tesayur aser kaketshir temi temeja ken ka tena liasü.

6th International Conference on Intelligent Systems & Machine Learning tenzükogo



Dimapur, Tsüklai/February 24 (TYO): School of Engineering and Technology, Nagaland University, Kohima Campus, Meriema ajanga ayongzükba 6th International Conference on Intelligent Systems and Machine Learning sentong February 24, 2026 nü tenzükogo aser February 25, 2026 tashi alitsü.

Iba mungdang tenzükba sentong nung Er. Bendanchila Longkumer, Assistant Professor, Department of Electronics and Communication Engineering menden liasü.

Iba sentong nung tongti tesemdang Prof. Jagadish K. Patnaik, Vice Chancellor of Nagaland University liasü aser pa ajungben nüngdak kar adokba mechi sentong nung medentetba yong record video speech

agütsü. Pai iba mungdang ayonger nem tenüngsang agütsü aser tarutsü nung sentong tali ayongzükba agütsü ajungmesoa liasü.

Prof. Sujata Dash, Program Chair ajanga pela agizükba o jemi aser iba mungdang indang sentong tejangja lemsatepa liasü.

Prof. N. Venuh, Pro Vice Chancellor, Nagaland University, Kohima Campus - Meriema ajanga School of Engineering dang pelaba lematep.

Sentong nung Prof. (Dr.) A. Elayaperumal, Director NIT Nagaland ajanga 'AI for ethics and Ethical usage of AI' onük nung ajemdaker jembia liasü.

Dr. Soumya Prakash Otta, Jurisdictional Director STPI Guwahati; Er. Sabou Yashu, Dept. of IT, Govt. of Nagaland;

Dr. Soumya Chakraborty, Director NIMSR nungeria iba sentong nung o tatsütsü jembia liasü.

Prof. Sachinandan Mohanty, General Co-Chair ajanga 6th Edition of ICISML indang jemi, koba School of Engineering and Technology, Nagaland University den lungjemer ayongzükba liasü.

Papers 1000 dak tema nguogo aser papers 249 agizükogo aser SCI and scopus indexed Jove and PES journals and Scopus Indexed AIP proceedings nung adoktsütsü ta pai ashi.

Er. Ayangla Jamir, Assistant Professor, Department of Electronics and Communication Engineering ajanga melepzüng o jembia sentong tembang.

Angh-i Sekreny benjong salem lemsatep

Dimapur, Tsüklai/February 24 (TYO): Angami nung adianu aser adianutsür ajunga dangi Sekreny benjong salem abener, ta Nagaland Angh Ajay Kumar Bhalla-i sangdong ka nung ashi.

Sekrenyi ya asüngtetshiba aser asendenshiba benjong ka lir, kong telungjem, yimya tajung aser sobaliba nüma jangjashitsür.

Sobaliba yima nung külem-keja aser nüburtem telungjem nung iba benjong aungdang, kati ka akumtsüboa aser arok terenlok asoshi mulungsoa nokdaktsü ayongzük.

Asen sobaliba tajung wazüka ayuba den külemi asen lokti tesunep aser yimchiyimjung nung alitsü asoshi külemi inyakti, ta Nagaland Angh-isa ashi.

Chennai nung MATRUBHASA DIVAS ayongzük



Dimapur, Tsüklai/February 24 (TYO): International Mother Language Day nung MATRUBHASA DIVAS, sobaliba sentong ka February 22, 2026 nü Chennai nung ayongzükba liasü.

Iba sentong ya North East India Welfare Association Chennai (NEIWAC) tir aser Naga Christian Fellowship Chennai (NCF Chennai) indang pastor Wapangtoshi-i lapokja liasü.

Wapangtoshi-i iba sentong nung jembidang India indang maitsü dangar dak alakteta aliba indang tali jangjashia, "India ya maitsü ka kisüng nung metembangtsü. Oshi ka kisüng masü, sobaliba ka kisüng masü, tamangba yimsü ka kisüng masü mesüra political ideology ka kisüng masü. Ajisüaka India-i 'unity in diversity' tali jangjatsür,

koba kin balala yimjung nung külemi aliba indang sayur," ta ashi.

Linük ka ama lungjemer item telemsa agizükba nung chichiba tashi ji lir. India ya otsü ka kisüng masü saka otsü zünger mezüngmai aliba linük ka nung külemi taktepba lir, ta ashi.

Iba sentong ya Bharat Bharati Tamil Nadu ajanga Agarwal Vidyalaya, Chennai nung ayongzük, kong states 22 nungi teshimtet nisung temi shilem agia pei sobaliba yimya pei tetsü oshi nung sayua liasü.

Sentong nung Akumpong Jamir-i Ao ken ka tena liasü.

"Language, Attire, Devotion, Food, Travel" omen nung ajemdaker iba sentong ayongzük, kong nisung noklang aika adenshia linük ajunga nung tetsü oshi wazüka ayutsü nüngdakba tali tejangjaba nung angatetjema liasü.

Chümoukedima nung mock disaster management exercise ayongzük

Dimapur, Tsüklai/February 24 (TYO): Chümoukedima Village Ground nung February 24, 2026 nü district-level Disaster Management Mock Exercise ka ayongzükba agiogo. Ibai 2025-26 atema Mock Exercise nung shilem ka ama liasü.

Iba exercise ya District Disaster Management Authority (DDMA), Chümoukedima ajanga National Disaster Response Force (12th Battalion) den lungjemer ayongzük.

Menoknok tesashi ka anoka ki ka chirepba ama tensa yanglua rescue and response operations agiba maparen inyaka iba mock exercise ya agia liasü.

NDRF team-i menoknok anokdang ama yimya balala amshia asangang nung rescue operation agir ama inyaka liasü.

Rescue team temi search and rescue techniques, victim extraction, evacuation procedures aser emergency

medica response sayua liasü.

Iba exercise mapang SDO (Civil) Chümoukedima, Shreyansee Jain liasü aser pai iba inyakyim repring. Iba mock exercise nungya Fire and Emergency Services, Transport, Health departments, Chümoukedima Village Council, CSOs, volunteers aser nüburtemi shilem agia liasü.

Iba mock drill sülen NDRF team-i Chümoukedima Village nungi kaketshir aser civilian tem den sensaksemba mapang ka agia iba mapang Cardiopulmonary Resuscitation (CPR) techniques yimya sayua liasü.

Lanurtem nem takum kumzüksü yimya angazükdaktsütsü nükjidong nung iba sentong ya ayongzük.

Ajungben lendong mapang saksalema alitsü, telangzuba agütsüba agencies tsüngta amalitep tajungba alitsü aser nüburtem nem awareness agütsütsü mechi iba mock exercise ya ayongzükba liasü.



Jharkhand, Chatra district kübok Simaria anasa Redbird Airways Pvt Ltd Beechcraft C90 air ambulance tsükokba tesem nung security ketdangsürtem aser iba tesem nung alirtem adenshir aliba noksa nung angur. Iba tayimtsü tsükokba lendong nung nisung tenetprongla asü.

SC-i Odisha, Jharkhand nungi obendangertem anisemtsü atema Calcutta HC nem temelaba agütsü

New Delhi, Tsüklai/February 24 (Agencies): Supreme Court-i West Bengal nung tang Special Intensive Revision (SIR) benoka inyaka aliba nung teyari agütsütsü atema kidanger Jharkhand aser Odisha nungi civil obendanger aser judicial ketdangsürtem anisemtsü atema Mongolbarnü Calcutta High Court nem temelaba agütsüogo. SIR dak sendakba nung temepishiba aser tashishiba aika bangdaka aliba apir SC-i iba temelaba ya agütsüogo.

Chief Justice Surya Kant, Justice Joymalya Bagchi aser Justice Vipul M Pancholi nungeri tentetba bench kati Calcutta High Court indang Chief Justice-i yokba shiti agizükogo, kong Special Intensive Revision (SIR) exercise atema mapa lezmükja aliba district obendanger 250-i temepeshiba aser tashishibatem bentettsü atema anogo 80 shi agütsü ta shia lir.

Shiti nungsa, logical discrepancies aser unmapped voter record dak sendakba nung petition lakh 80 shi lir, koba asadangshitsü nüngdaker ta shia lir.

Temepishiba aser tashishiba lakh 50 shi achaayangtsü atema tang district obendanger aser district obendanger talila 250 shi nem mapa nonglokja lir. Ketdangsür ajaki anogo nung ken o 250 bentetaka iba inyakyim ya anogo 80 shi agütsü ta SC-i angatetogo.

Tensa apir aser mapang mali asünung iba bench yagi inyakyim nung teyari agütsütsü atema civil obendangertem anisemtsü temelaba agütsüogo. Parnoki Calcutta High Court chief justice dang Jharkhand aser Odisha chief justice dang inyakyim nung teyari agütsütsü atema judicial ketdangsürtem yoktsü atema mepeshitsü shiogo.

Item ketdangsürtem

senzüsenpongba, anenzükba aser chijemba nung entokba sen ajak ya Election Commission of India-i agütsütsü.

Kasa mapang nung iba inyakyim mapang shitak nung tembanga inyaksü asoshi SC-i Constitution Article 142 kübok paronk nem plenary tashi agüja aliba amshio. Okdakisa electoral roll tatembangbuba ya February 28 nü sayatsü temelaba agütsüogo. SC-isa, iba mapang tashi nung "logical discrepancy" aser "unmapped" category dak sendakba nung inyakyim tembanga minyaki lira EC-i supplementary list tem adoktsüyonga aotsü ta jangjashitsüogo.

West Bengal sorkar aser EC na atsütepba süoki ia bilema February 20 nü SC-i tang tinyakdak aser mapa nungi anener aliba district obendangertem state nung SIR inyakyim atema anisemtsü tetuyuba agüja liasü.

Rajkot nung ki 1,300 dak tema raksatsüogo

New Delh, Tsüklai/February 24 (Agencies): Gujarat kübok Rajkot nung civic authority temi Aji ayongküm nung ozüing alema ali atsünger alirtem indang ki 1,300 dak tema raksatsüogo.

Iba ya Rajkot Municipal Corporation-i ayongzükba demolition drive tulutiba lir, koba police 2,500 dak tema yoka security akangshir benoka inyaka liasü, ta PTI sangdong ka ajanga metetdaksü.

Deputy Municipal Commissioner Mahesh Jani-i PTI dang ashiba agi, ki 1,500 shi nem osang agütsü, kong ayongküm nung ki 681 shi aliba densema lir. RMC-i Mongolbarnü 2 ako tashi nung Aji ayong kümbang nung ki

1,350 shi raksatsür liasü, ta civic chief Tushar Sumera-i ashi.

Iba inyakyim kecha tetsükdaksü makai benoka inyaksü atema local police, surveillance team, drone surveillance unit, Special Operations Group personnel, Quick Response Teams (QRT) aser State Reserve Police Force tem iba tesemi yoka liasü.

Iba inyakyim ya Jangleshwar kübok ayongküm nung benoka inyakdar, kong ozüing alema ki 1,400 dak tema amenoka lir.

Kasa mapang nung Dy Municipal Commissioner-i ashiba agi, ozüing alema amenoker alirtem agintsü municipality bendanga agütsür

lir aser kasa mapang nung iba inyakyim agi kongshiba kibongtem housing scheme küboki aitdaksütsü. Jani-isa, sentong yanglur aliba ama hopta ka tsüingda lenmang tasen yanglutsü, ta ashi.

Ki merketetja aoba inyakyim ya tera meyilongi aoer, kechiyong multi-storey ki aser palatial bungalow tem dena raksatsüyonga odar.

JCB, tractor, breaker aser dumper tem 260 dak tema anisemer iba mapa benoka inyakdar. Palatial bungalow tem raksatsütsü atema earth-excavating machine aser extra-large hydraulic excavator 65 dak tema amshidar, ta PTI-isa metetdaksü.

Kerala nungja Keralam agi melentsü Union Cabinet-i agizükogo

New Delhi, Tsüklai/February 24 (Agencies): Ato Kilonser Narendra Modi lenisüba nung Union Cabinet-i Kerala nungja 'Keralam' agi melentsü agizükogo.

Union Cabinet nung agizükba sülen India tir-i Kerala (Alteration of Name) Bill, 2026 ta nungja agütsür bill ka Constitution of India article 3 kübok parnok tebilemba lemsateptsü atema Kerala State Legislative Assembly dangi refer asütsü.

Kerala State Legislative Assembly nungi parnok tebilemba agizükba sülen India sorkari maneni jenjang tapet agütsü aser Parliament nung Kerala state nungja Keralam agi melentsü atema Kerala (Alteration of Name) Bill, 2026 benoktsü asoshi tir recommendation agizüktsü.

State nung assembly election magi tsüingda tang nungja melentsü atema agizükogo. Kerala nung election agütsüba anogo ya Election Commission of India (ECI)-i tang tashi mesangdongi lir.

2023 aser 2024 küm chief minister Pinarayi Vijayan-i, "Kerala" nungja ya Constitution Eighth Schedule densema oshi ajak nung "Keralam" agi melentsü atema benok. Iba bangzüng ya assembly nung

anaben agizüka liasü. Mezüingbuba bangzüng asadangba sülen Union Home Ministry-i technical tsütsü temelenshi kar asoshi benoka liasü.

Bangzüng nung Kerala sorkari India Constitution article 3 kübok Kerala state nungja ya 'Keralam' agi melentsü benoka liasü.

"State tenüng 'Keralam' ya Malayalam oshi lir. State ya oshi dak ajemdaker 1956 küm November 1 nü tenteta liasü. Kerala Piravi Day ya November 1 nü amunger. Linük nüjiso atema raraba mapang nungi Malayalam oshi jembiba nüburtem atema United Kerala ka tentettsü takhangba liasü. Ajisüaka Constitution First Schedule nung ozü state tenüng ya "Kerala" ta mangaoka lir. Iba Assembly yagi Centre sorkar dang Constitution Article 3 dak ajemdaker state nungja Keralam agi melentsütsü atema takaratiba nung jenjang agütsü mepeshir," ta bangzüng nung shia lir.

2016 küm Gurgaon nungja ya Gurugram agi melenba mapang RSS-i Union sorkar dang Kerala ya 'Keralam,' Ahmedabad ya Amaravati', Hyderabad ya 'Bhagyanagar', aser Aurangabad ya 'Sambhajinagar' agi melentsü shidanga liasü.

Maoist lenir Devuji bendanga agütsüogo

Hyderabad, Tsüklai/February 24 (Agencies): Tongtibang Maoist commander aser iba tenokdangba agütsür aliba CPI telok indang tasa asar Thippiri Tirupati, shiba dang Devuji ta ajar, pa Mongolbarnü Telangana police nem bendanga agütsüogo, ta police-i ashi. Pa iba telok nung küm 40 dak tema züngoksemer liasü.

Devuji ya tongtibang Central Committee züngsem ka aser Maoist party indang politburo züngsem ka liasü. Pa aser central committee züngsem Malla Raji Reddy na state DGP B Shivadhar Reddy matsüingdang bendanga agütsü.

Devji aser Raji Reddy na den ano Bade Chokka Rao @ Jagan aser Nune Narasimha Reddy @ Ganganna nata bendanga agütsüogo, ta Reddy-i ashi.

DGP-i ashiba agi, Devuji ya party' politburo indang Central Committee senden ka nung CPI Secretary ama shimtsü liasü.

Ken o asüingdangba mapang Devuji-i, pa temang manenba ajanga bendanga agütsü, ta ashiba den temzüng ozüing kübok pa maneni yimden yimsüsüba nung shilem agütsü tenangzükba agütsü.

"Kü jurila taküm asoshi masü saka temang manemba ajanga ni telungpur taküm ya tokja mainstream nung adentsü telemtetba agiogo. Temzüng ozüing kübok nüburtem tebilemstü bentettsütsü asoshi maneni inyaksü telemtetba agiogo. Iba tetezü ni maneni



yimden yimsüsüba nungbo shilem agütsü. Ni küm aika amanga aruba philosophy yagi ni len anitsü," ta pai ashi.

Devuji ya Jagtial district kübok Korutla jila nungi lir. Pa tebu Venkata Narsaiah ya aluyimer ka liasü. Pa teyi ka aser tenu ana lir.

Devuji aser Arike Jaini @ Srujana na 1991 küm January kibong aküm. La ya Devuji den kibong akümba mapang Perimeli Dalam nung party züngsem ka liasü. La ya Regional Committee züngsem jenjangi ajungkettsü aser 2020 küm Gadchiroli district, Maharashtra nung Kasansur arem nung khatepba mapang asü.

Pa ya RSU Korutla Town aser Karimnagar district indang tir liasü. Pa küm aika revolutionary ideologies tem bushiba sülen CPI people's war nung aden.

Pa 2001 küm Central Committee züngsem aküm aser 2016 küm CMC in charge kümdakja liasü, ta police-i taoba mapang shir liasü.

India Youth Congress national tir Udaya Bhanu Chib okadaki anir aruba sülen Congress worker tem Patiala House Court kima longkak aitba mapang tangokba noksa nung angur. Bhanu ya New Delhi nung AI Impact Summit mapang longkak aitba dak sendakba nung pua liasü.





TIR YIMYIM YIMOBILEM (EDITORIAL)

DIMAPUR WEDNESDAY, FEBRUARY (TSÜKLAI) 25, 2026

Ajep nung dang mama yongdaksür!

Tanü asüngbo mamayonger tanurtem yaa-tzuraba agi mama meshia ajepba mangashir, kechiyong tetsütemi tanur yaa tzüraa metoktsüi mapang shitak - shitak nung tachi-tajemtsü shitak agütsür. Ajisüaka, akhidangbo tetsütem alu aser ki mapa nung kanga mazüngi inyakba agi pei tanur nem mama yongdaksütsüa mapang mangu, anungji tanurtemji majep tashi mama yongdaksütsü meblemtem. Aji oda, tanuri mama meshia ajep nung dang maaa yongdaksü. Ibaji mesüka tanü Nagaland nunga nübortemi longkak aita makang tashi mesüra okadak ken o benoka mejembi tashi government-i nübortem asoshi inyaktsütsüba terenlok mapatem meinyaktsür. Iba jagi government-a kanga akoksar aser nübortema tim matemtsüba ka ser nung timtem kanga ajurur. Iba ama timtem majurui pelatepa nübortem asoshi terenlok mapatem jungjunga inyaka aotsüba ser nung nübortemi longkak aita merongshi tashibo meinyaki anenba mapa kaji, Nagaland Foothill Road ya asütsü. Iba jagiang 2013 küm nungi Foothill Road Co-ordination Committee-i anir nübortemi khen ola adoka longkak aita apusoli, idangji government-i mapa tilaka inyaktsüli aser ano nübortemi longkak aita kangli, idangjia tatsüka inyaktsüli ta gari tamajung nungshir amai, nübortem longkak aitba yari inyaktsüba angur. Aji oda, yaküm küm a iba kasa lenmang atutsü asoshi mapa alemdang, FHRCC o government na tsüngda mangatetep adoka governmenti mulungba nung dang mapa inyak tenzükba asenoki nguogo. Iba mapang PWD (R&B) minister-ibo mapa angur contractor-temi mapang shitak nung mapa shitak merenemtetra, pa minister menden toktsütsü tashi yimjak nung ashiba nübortemi mamai lir. Ajisüaka, tia majung, government küm atemtsübo ita ka dang anünga lir, saka contractor anati Wokha len mapa shitak meinyakteti anendaka aliba indang asenoki metetogo. Shitakba nungbo, tang yabo ano anünga akaba mapatem inyaktsü asoshi mapa lemstütsüba mapang lir, ajisüaka government den tesendaktep tajung akaba telok anatiang Wokha len mapa metemtetbaji tebilemba tajungbo masü, kechiyong shitakba nungbo parnok jagiang mapang shitak nung mapaa tajungba renemtsüla. Ajisüaka, mapang shitak nung mapa tangar dang nungi tajungba renemtsüba melen, department nungi tasüngdangba yoktsüsa alibaji, asaa nübortem mezüngmeshiba mapa ka asütsü. Iba jagi FHRCC-i government dang ano khen nenshia March 31 tashi nung anünga akaba tesemtem nung lenmang atutsü asoshi mapa magütsüra aser March 31 tashi nungjisa merenemi aliba mapatem merenemra longkak aitsü ta metetdaksüba, atangji talaktsüka, saka iba jagi dang ano khen government arakzüksü. Iba amai asen government-i asen atema inyaktsütsü asoshi asenok longkak ait ataba sobaliba yimya yabo kanga majung aser jenjanga tasak. Government ya government nung alir mesütsü aser anüksü alir masü saka nübortem asoshi inyaktsütsü, nübortem anüksü aser anepalutsütsü atema alir, anungji government nung alirtemi nübortemi parnok nungdak meshia longka ait atatsü kecha nungdak mali, kechiyong parnok tangutsü tim kechisa lir, itemji agütsütsü aser inyaktsütsü asoshi mapa aser mapang telatet ka ka lir, anungji mapang shitak nung nisung shitaki government sentong nung aliba ama inyakra, government nung alirtema pei tenüng tajung agitsüsa inyaktsü aser kodang mapang shitak nung nisung shitaki senotsü shitak amshia inyakdir, shinga pei mapang aser rongsen lalua longkak aita mejajatsü. Atangji, asen state nung yabo mulungdok teloki mita melira aser manidakra shinga daka temulung alemtsü mali, asenok ajak ochimashir tetsüti kaka kümogo. Anungji, tamajung tentepa asüyonga pei jangpong aser senpong nung enoktsü bilema inyaker masüji, pei tetsü taso lima nüchiso jenjang ka asoshi rarar ta bilema, tang teinyakdakba gari lenmangtem ya merenem tashibo FHRCC nungita senso ajaki ola adoktsüla. Iba lenmang nung ya FHRCC purtem kisüng jajatsüba masü saka kenüa mati amang agi sangwa aser sangwa agi amang kuma yimkong jajatsüba lenmang lir, anungji iba lenmang yabo asenok ajaki kanga junga mita lia renemdaksütsüba jagi kanga tongtibang aser tenüngdaksü kümogo.

OLEMSABANG

MUNGDANG LENNIR-i MAPA TAJUNG APITETA INYAKOGO

- L. Kika Pongener

Tsüklai (February) 26 anogo nung, Impur nung Ao Baptist Arogo Mungdang (ABAM)-i Zone 1,2,3,4,5,6,7 nungi lim arogotem nung sannukertem ajak ayunga; 'Ao Oshi Terenlok' asoshi sentong tajung yanglua agiba; osangkaket nung ngua kanga pela-a züngogo. Aji oda, Ao oshi tali tajungba renloktsü asoshi ABAM-i temulong agüja inyakba ngua mungdang lenirtem nem tenungsang agütsür. Ano iba den külemi ABAM küpok lim arogotem ajunga nung küm shia Ao oshi wazüka ayutsü nungdem nung Deobar ka shiteta sentong tajung yanglua amungba ya mapa tajung lir. Taküma taoba hopta 22nd February deobar anogo nung "Ao Oshi Dangi Meyipdi" omen nung ajemdaker sentong tajung yanglua ABAM küpok lim arogotem ajak nung mungogo. Akok asübo küm nung khen dang masü; anaben-assembly iba amai sentong tajung yanglua amung nungpo lanurtem asoshi tajangzük tulu asütsü ta bilemer.

Ano iba anogo nung sentepi arur ajaki pei kin sobaliba subotsü subor aruba ya; oshi dang masü, asen sobaliba ayak aser subosolemsü mesamai wazüka ayutsüba nung kanga tongtipang mapa ka asütsü. Ashiko, karibo tenla kidang 'Tsüngkotep-Su' apenba; iba tola (Waist-Coat) asema ya temenen amai bilemsü akok. Mesura Tsüngrem lartemibo Tsüngkotep-Su ya mapentsüla/masemtsüla ta-ka bilemsü akok. Ajisüaka, kanga junga shisadangra; iba ya asen Aor sobaliba subotsü lir. Tanü putu nung tazünger temeteteri anir lennir aikati tongtipang lokti-senden (Ocassion) balala nung 'Coat/Suit' & 'Neck-tie' subor/agir aser tenla kidangia subor arur. Aji oda, kanga junga shisadangra; iba ya asen Ao kin sobaliba subotsü masü; anuolen alir temesunger 'European' nunger sobaliba subotsü lir. Asen Ao limai Khristan yimsu marudangbo iba subotsü ya asen Aor-i khenyongi mongudang aser memeteti liasü. Asenoki tangar lima nunga reprangdangra...Khristan yimsu agizükba agi achi-ajemba, libaliru aser yimsu-yimpong tamajungtem melenshiba dak alaka; pei kin sobaliba subosolemsü endoker; tangar kin sobaliba subotsü melena subobabo mangur....Anungji temesunger sobaliba subotsü ya Khristan yimsu subotsü amai mangatetli; aser asen sobaliba subotsü yabo limapur temenen subotsü amai mangatetli. Aji oda, bendanger (Foreigner) sobaliba subotsübo temenen masü; saka asen sobaliba subotsübo limapur temenen subotsü amai angatetba...iba tangatetba yabo tai tangatetba-a ta nibo bilemer....Aotsür Aor tashitemetetertem-ia koda ashir (?) arok külemi kanga junga shisandangdi.

Ano kanga pelaba kaji....Impur nung akaba 'Asayadak Moapu' (Play Ground) nem 'Dr. T. Ao Ground'....ta nungja jaloktsüba osangkaket nung ngua kanga pela-a bilemer. Iba ya-a mapa tajung ka apiteta inyakogo ta mungdang lennir nem tenungsang agütsür. Kokrabangla, tarutsü nungpo 'Dr. T. Ao Stadium' ta ajatsü mangdang ayutsüla. Mokokchung jila nung akaba asayadak moapu nem 'Imkongmeren Sports Complex' ta jaloktsüba; Govt. Higher Secondary School nem 'Mangyangnokcha Higher Secondary School' ta jaloktsüba; aser Civil Hospital nem 'Dr. Imkongliba Memorial Hospital' ta jaloktsüba...item ajak ya mapa tajung lir. Anungji Aotsür Aor lanurtemi item 'Nungshi' mapatem ya metsüngareta wazüka ayutsüla. Ano kokrabang Mokokchung jila nung 'Dr. T. Ao Sports Academy' ka lapoktsüla aser 'Stadium' ka yanglutsü mangdang ayutsüla. Ano kokrabang, tarutsü nug asen lennir Late. P. Shilu Ao aser Dr. S.C. Jamir tena nungjalok Mokokchung jila nung 'Nungshi' mapa karbosa inyaktsü mangdang ayutsüla. Iba ama mapa tajung inyaktsü atema Aor legislators aser Bereaucrat-temi pei akokba lenmang nung nungita yaritsüla. Asenoki mangdang tulu yur longjemer inyakra takok angutsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Odisha Khristanpur tekülem sentong nung timtem agütsü



India anüdoklen Odisha state nung January 25, 2026 nü Hindu tribal nisung temi Khristanpur den asatepdang tangokba noksa ka yangi angur. Iba sülen Hindu nunger temi parnok tekülem ki raksatsü.

Bhubaneswar, Tsüklai/February 24 (Agencies):

India anüdoklen Odisha state nung Khristanpur Deobarnü tekülem sentong agiba mapang tribal Hindu telok kati timtem agütsüba sülen tetsübo nung alir.

Christian Evangelical Assembly züngsemtem February 22, 2026 anepdang 9:00 ako meta Deobar sentep sentong agiba mapang nisung 50 shi arua timtem agütsü.

"Onok sarasademba ajanga parnok tsüngrem tem mepelar ta ashi aser anentsü totuyuba agütsü," ta Pastor Jagannath Naik-i ashi, shiba Mayurbhanj district kübok Badabali Chua yimtsüng nung par kidang lokti tilaka ayongzüka tekülem sentong ya agia liasü.

Nisung telok ka ya süng amer par ki telungi ait aser parnok karbo yi agi meseper ama liasü, ta Naik-i ashi.

Parnoki pa kinungtsü dak mezüng teka sangshi aser pai iba tatalokba ya pa indang mobile phone nung record asütsü merangba mapang pa ali nung nungoktsü aser tetsüng agi metsü tenzü.

Tantsü ka tetsüngtai aittsü merangba mapang la-a merenshi.

"Ni iba tatalokba indang video agia aliba parnok delete südaksü," ta pastor-i ashi.

Parnoki police emergency helpline number nung call asü saka police tem gari lendong ka ajuruba nung mazüngi lir aser meiloni arutsü ta langzü, ta Naik-i ashi.

"Ajisüaka tang tashi police kata onok yaritsü arua mali," ta pai ashi.

Tasüng February 23, 2026 nü kasa telok yagi Khristanpur kija ajurua parnok Yisu külemba manenra azüdokshitsü amokmerena liasü.

"Yangji aliba Khristanpur tetsübo nung lir, aser aika tetsübo nung pei ki yutsür aotsü bilemer," ta Bishop Pallab Lima-i ashi, shiba United Believers Council Network India tekolakba lir.

Iba yimtsüng nung tensa kanga mejungi lir, ta Lima-i UCA News dang February 24 nü ashi.

Mayurbhanj district ya Khristanpur asoshi timtem aliba tesem ka lir ta pai ashi aser

yangji aliba ketdangsür aser talisa police temi iba timtem atalokba nung telangzüba magütsüba asoshi aija liasü.

Catholic Archdiocese of Cuttack-Bhubaneswar nungi Catholic putir Father Madan Sual Singh-i 1999 küm Manoharpur yimtsüng nung Australia nunger missionary Graham Staines aser par jabaso ana rongsetba bilemteta ashi.

Yangji tilateri atalokba nungia kanga kera tzüzüng-ozüng tensa tamajung akumer ta pai ashi.

Singh-i meta talang nung aliba tamanger telok tilatem dang kanga kumdangtsü ayongzü, kechiaser Odisha nung June 2024 nungi Bharatiya Janata Party (BJP)-i yimsü asü tenzüka sülen Khristanpur anema azüdokshiba aser merenshia amshiba tali akumer.

2024 küm Odisha nung tekülem kidang sarasadem sentong anendaksüba, tamangertem tasü mang aremtsü memelaba aser yimtsüng nungi jendokba ama

Khristanpur anema inyaksangshiba 40 liasü, ta New Delhi nung aliba United Christian Forum (UCF) ajanga data ka sangdongba nung ashir.

UCF-i item yimya yagi anisüngzü, magütsü aser Khristanpur dak tenük yoktsü asoshi ashikülak mapa amshia tamangba yimsü melendaksüba kuli tiazü amshir ta ashir.

Item ya talisa BJP-i yimsü asüba state tem nung ataloker, ta UCF-i ashir.

Odisha nütsüng yongsük million 42 nungi Khristanpur shilem 2.77 dang lir aser shilem 90 dak tema Hindu nunger aser lisopurtem lir.

Khristanpur anema azüdokshi tesashitiba ya Kandhamal district nung August 2008 nung ataloka liasü, aser iba mapang hopta tenet tsüngta Khristanpur 100 dak tema tepset.

Kasa mapang tekülem ki 300 raksatsü, Khristanpur 6,000 indang ki nungi rakzükraktema tamanger 56,000 dak tema talidak ki makai kuma liasü.

Northeast India nung Khristanpur timtem tali ajurur

Itanagar, Tsüklai/February 24 (Agencies):

India indang northeastern states nung aliba Catholic nunger lokti tentet kati sorkar dang Khristanpur dak tenük yoker timtem agütsüba aser loktiliba nung tebilemtsü agütsüba nungi kumzüka ayutsü teyari meshia liasü.

Küm 107 tejen All India Catholic Union (AICU)-i ashiba agi, region nung aliba states tenet nung Khristanpuri ozüng balala agi merenshiba, shilem magidaksüba aser azüdokshiba timtem ajurur aser state sorkar temi constitution nung tamangba yimsü temeden agüja aliba wazüka ayutsü ayongzü.

"Item northeastern states nung Khristan yimsü kanga nungshir. Sorkar temi tamangba yimsü temeden wazüka ayutsüla, kin tilatem kumzüka ayutsüla aser yimjung nung aliba yimya ajungkettsüla," ta AICU odongtar John Dayal-i UCA News dang February 23 nü

ashi.

Iba telok indang tebilemtsü ya talisa 1978 Arunachal Pradesh Freedom of Religion Act mapa kuma amshitsü merangba nung rangloker lir, koba ajanga tashiyim amshia, ashikülaka mesüra mesüzüka tamangba yimsü melendaksütsü memelar.

Arunachal Pradesh yimtiba Itanagar nung parnok indang working committee senden ka mener February 21, 2026 nü sangdong ka agütsüba nung, iba ozüng yagi baptiba ama Khristanpuri amshiba yimyatema mapa tamajung ama kumdaksür, ta AICU-i ashi.

Mapa kuma inyaksü ozüng tem maliba ajanga iba ozüng ya küm aika tasü ama lir, ajisüaka tawa iba ozüng asendenshitsü merangba ajanga Khristanpur telok balalai longkak aita iba ozüng ya Khristanpur anema mashi lenmang nung amshitsü ta ashir.

Arunachal Pradesh nütsüng yongsük 1.6 million aliba nungi

ANOGO ABEN TSÜNGREM DEN**Tasen tekülemdak ka**

O Tsüngrem, anemeri kopiga arütsütsü ?

Tsükchir-i tatem makai nü tenüng atalatsü ama ? .

T.Ken. 74:10

Babylon nunger-i Yirusalem yimti aser tekülemdak raksatsübaji Yihuda nunger asoshi timtem tulu liasü. "O Tsüngrem, nai kechiba ni teti asoshi endok ? Kechiba nü chiyim dak san anema nai ain adok". (T.Ken. 74 :1). Parnoki Temenen menabayong ya parnok dangi temerenshi aruba liasü. Parnoki parnok atema yimti tulu yanglu. Tebur tajung tekülemdak asü. Timtemji ya , parnok yimti aser tekülemdak ki nung temolung alem, saka Kibuba dang tashi manga. Parnok Temenen agi tekülemdakji menentsü. "Iba ki rakzükraktemer leprung ki aküm" (Yr. 7: 11). Tsüngremi aji memela, anungji pai Babylon nunger yoka aji raksatsü.

Tanüa tsükchirtemi Tsüngrem mapa raksatsür, parnok süngdong alener mekangba mesüka lir (T.Ken. 74:5). Tsüngremer nüburtemi kechi inyaksü ? Asapi kechi ashi ? Asenok pa chiyim dak chiyimba santam lir. (T.Ken 74:1) Pa sannüker tajung lir, Pai santem asoshi pei taküm agütsü. Babylon nunger anema santem tekümükdak kong lir?

Asenok Tsüngremer nübur lir. "Lipok nungi nai alizükba telok ... bilemtetang" (T.Ken 74:2). Tsüngrem asenok dak alir. Yirusalem aser tekülemdak raksa, saka iba nung tuluba pai rizungja lir. Yisu alimai alu aser Tsüngrem sentsüwangshi jungai adoktsü. Tang pai tekülemdak tasenba yanglur, aji Pa Arogo, aser ibaji kodanga meraksatsü.

Khristanpur shilem 30 shi lir aser tang tashibo tamangba yimsü nung ajemdaker lendong timtem mali ta ashir.

Arunachal Pradesh nung sorkar kumteta aliba Bharatiya Janata Party den sendaktepa aliba activists aser parnok bhukumer northeast nung tali kumogo aser nüburtem tsüngta mepetmesü adokdaksüba lir, ta AICU sangdong ajanga ashi.

Catholic nunger telok yagi Manipur nung maneni kin balala tsüngta azüdokshiba tebilemtsüa lemsatepa liasü, koba May 2023 nung Khristanpur timba Kuki-Zo aser Hindu nunger timba aliba Meitei kin tsüngta tenzü.

Tang küm asem buba nung lir, aser iba azüdokshi nung nisung 258 dak tema asü, nisung 60,000 shi pei ki yutsür tesem balala nung prokshia lira ser tekülem ki 400 dak tema raksatsü. Kuki-Zo kin tem takoksaba tia nung lir.

Manipur yimtiba Imphal nung arogo lenirtemi ashiba

agi, tekülem ki nung tali tenük yok aser United Nations mongin temia mela-mela timtem ajurutsüsa aliba kin tem kumzüka ayutsü shia lir, ta AICU-i ashi.

AICU-i federal sorkar dang tangatetep kati arudaksütsü merangba nung tali tashi itshitsü, ki o jen raksatsür aliba tanaben yanglushitsütsü aser humanitarian aid agütsütsü ajungshia liasü.

Catholic tentet yagi ano Meghalaya nung tebilemtsü tali akumba indang lemsatep, kong tribal nisung timba sür nütsüng yongsük 3.35 million sh aliba nungi Khristanpur shilem 75 lir.

Telok kari federal sorkar indang list of Scheduled Tribes nungi Khristanpur tribal nisungtem agientsü asoshi jembir, aser tamangba yimsü melenba ajanga rongsenketzüng teyari, universities, mapa, legislature aser parliament nung menden wazüja aliba agientsür ta ashi.

(Maneni tapak 7 nung...)

AO OSHI ANGAZÜKDAK:

TANÜ ANGAZÜKTSÜBA OJANG



Tzüti

(n) ayongtem rongnung tulutiba (biggest river)

* Asenoki tzüla ayong ya tzüti ama züngshir.

Tzütioti

(adv) ken o tulu (serious statement)

* Telok nung tzütioti ken o tasak mebenoktsüla.

OLONG PAITEP # 7425

Grid for OLONG PAITEP # 7425 with numbers 1-17 in various cells.

TIPLÉN

- 1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 7424 TELANGZÜBA

TIPLÉN :

- 1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

- 1. Temesen, 2. Raksa, 3. Aon,
4. Aso, 6. Nile, 9. Alizüng,
10. Omen, 11. Lemta, 13. Ola,
14. Kin.

NAI-A YA METETTER



Australia tsür Alexa Szerstuk-i Shopkins memorabilia teimtiba bendenba atema alima otsü yangluteta lir.

Mareeba, Queensland nung alir Szerstuk-i la arishi küm 7 asüdang nungi Shopkins toys kanga meima saklok aser idang nungjagi lai Shopkins bendentsü tenzükba tang tashi nung tapu balala 2,656 bendena lir. La indang Shopkins toys collection nung ananü dena züngsemra 4,000 tema lir.

Arunachal Democratic Party-i Congress den loktepogo



Itanagar, February 24, 2026 (Agencies): Arunachal Democratic Party (ADP)-i February 23, 2026 nü Indian National Congress (INC) den loktepogo.

Itanagar nung sentong ka nung ADP ketdangpurtem aser züngsem ajaki INC nung aden. Congress-i democracy, secularism aser constitutional values asoshi tenanzükba agiba nung tamang kaa ka kuma lokteper ta ADP president Tami Pangu-i ashi.

Ajisüaka, iba ajanga Arunachal Pradesh Assembly nung Congress tashi nung mekongshir kechiyong ADP

MLA ka danga mali aser Congress MLA ka dang lir. Arunachal Pradesh Congress Committee (APCC) president Bosiram Siram tsüngdang ADP züngsemtem aniok.

"Congress sasep nung taoba ADP lennirtemi kasa tebilemstü khuret aser maongkatem angutsü" ta Siram-i ashi.

"Democratic rejutem kümzüka ayutsü aser constitutional governance tashi itdaksütsü atema onoki ka kuma lokteper. Congress sabang kübok onoki state dak sendakba tongti tebilemstütem asoshi ola adoktsü aser iba nung Article 371(H) meyipa

reprangshitsü dena lir" ta Pangu-isa metetdaksü.

Pangu-isa taoba chief minister Gegong Apang dang parnok nem Congress sabang agütsüba atema pelaba metetdaksü.

Taoba Arunachal Democratic Party (ADP) lennirtemisa AICC president Mallikarjun Kharge aser Leader of Opposition Rahul Gandhi nem tenüngsang agütsü.

Siram lenisüba aser pai state nung Bharatiya Janata Party anema noktakba nung ajemdaker onoki Congress nung adentsü lemtet ta ADP lennirtemisa ashi.

Centre-i Sairang railway station atema Rs 97 crore agütsü

Aizawl, February 24, 2026 (Agencies): Centre sorkari Sairang railway station ajungkettsü atema Rs 97 crore lemzüktsüogo aser iba ajanga Mizoram nung rail infrastructure ajungkettsü.

State sorkari Sairang nem "World Class" railway station jenjang agütsütsü mepishiba Ministry of Railways-i agizükogo

ta Chief Minister Lalduhoma-i ashi.

Sairang ya Aizawl nungi kilometer 21 shi pilar lir aser Bairabi-Sairang railway line nung terminal station ama amshir.

National railway grid nung Mizoram yimtiba densemba sülen international standards nung station ajungkettsü atema senotsü lemzüktsüogo.

Mizoram state sorkarisa Railway Minister Ashwini Vaishnaw den station anasa large-scale warehouse facility ka amenoktsü atema jembitepa arudar.

Sairang railway station nung Rs 97 crore endokba ajungketba ajanga modern passenger station ka dang masü saka commercial gateway ka akümtsü.

Manipuri film Boong-i BAFTA 2026 sempet angu



Imphal, February 24, 2026 (Agencies): British Academy of Film and Television Arts (BAFTA) 2026 Awards nung Manipuri film Boong ajanga Best Children's and Family Film award nguogo.

Boong ya Lakshmipriya Devi-i direct asü aser Farhan Akhtar'er Excel Entertainment ajanga yarir.

Best Children's and Family Film category nung Indian nominee ji Boong film dang liasü aser February 22, 2026 nü otsüsütsü sempet agizükba ajanga Northeast Indian cinema

atema tongtipang alizüng ka tongtetogo.

Boong ya "small film with a big soul" ta tetushi agütsü aser Zootropolis 2 o Lilo & Stitch ama den tokteper Best Children's & Family award angu.

Filmmaker Lakshmipriya Devi-i director ka ama inyakbaji Boong ya mezüngbuba film lir.

"Iba takok ya alima sabang nung Indian regional cinema atema tongtipang mapang ka lir aser Manipur nungi tashitait storytelling sayur. Iba ya international film festival arena nung Manipuri films atema nüma

atangba mapang ka lir" ta Lakshmipriya Devi-i ashi.

Devi-i tesüiba nung Bollywood projects aika nung assistant director ama inyakogo.

2024 Toronto International Film Festival nung Boong indang world premiere liasü aser iba sülen tongtipang benjung aika nung shimtetogo.

Warsaw International Film Festival 2024, MAMI Mumbai Film Festival 2024, 55th International Film Festival of India aser Indian Film Festival of Melbourne 2025 nung Boong film sayuogo.

Iran army helicopter ka shishilembadak chiok; nisung 4 asü



Tehran, Tsüklai/February 24 (Agencies): Central Iran nung army helicopter ka süngjalijang ayokba shishilembadak ka nung chiokba sülen military pilot ana aser shishilembar ana asü.

Helicopter ya Mongolbar anepdang Isfahan province kübok Dorcheh jila nung tsükok. Iba jila nung ya army indang tongtibang airbase ka amenoka lir. State media sangdong ka ajanga ashiba agi, tayimtsü ya technical aibeln ka ajanga tsükok asütsü.

State media-i lemsatepba video nung tayimtsü chioker aliba aser teküzükertemi iba tesem nung mi adoker aliba temseptsü merangba nguogo.

Army Aviation Training Centre-i sangdong ka ajanga ashiba agi, tayimtsü tsükokba

nung asüba pilot ana ya Colonel Hamed Sarvazad aser co-pilot, Major Mojtaba Kiani ta jangaogoo.

Kasa mapang nung shishilembadak mapa inyaka alira ana helicopter tsükoka mi adokba sülen asü, ta metetdaksüogo.

Army centre-i ashiba agi tayimtsü tsükokba ta bushisügangdang südar. Local judiciary tekolakba Asadollah Jafari-i ashiba agi, pai ken o ka lapokogo aser bushisügangdangertem yokogo.

Iran indang Air Force fighter jet ka aonung training mission ka mapang Hamadan province nung tsükokba sülen hopta ka majung tsügangda iba tayimtsü ya tsükokgo. Fighter jet ya United States nung yangluba F-4 model

tejen ka liasü.

State media-i ashiba agi, iba lendong nung pilot ka asü saka kabo jokteta tugutetba sülen jenboa liasü. Fighter jet ya kodaser tsükok aji jangjatsü atema bushisügangdang tesüdak lir, saka state media-i ashiba agi, technical aibelen ka ajanga tayimtsü tsükok asütsü.

US aser parnok den sendaktepa aliba linüktemi tenokdangba agütsür aliba ajanga Iran-i parnok indang military aser civilian tayimtsütem melentsü mekoki arudar.

Iran-i, Russia nungi fighter aser training tayimtsü aika alizükogo aser tang Su-35 jets alitsü merangdar, saka Moscow-i tang tashi ka danga agüja mali.

UK aser France-i Ukraine nem nuclear nok-nü agütsütsü sentong yanglur: Russia

Moscow, Tsüklai/February 24 (Agencies): UK aser France nati miima Ukraine nem nuclear nok-nü agütsütsü asoshi mapa inyaktar ta Russia indang Foreign Intelligence Service (SVR) ajanga ashi. Russia aser Ukraine rara Mongulbarnü küm pongu bubai ayaoka aiba mapang iba osang ya angashir.

"Ukraine nem 'Wunderwaffe' (German oshi nung 'miracle weapon') agütsütsü ta amanger. Kyiv ket nung nuclear mesüra 'dirty' bomb ta ajaba ya lira, parnoki tsükchitep yimya yutsüba nung tajangzük tali agitsü merangtsü," ta sangdong ajanga ashi.

"Tang Russian SVR ket nung osang angua aliba agi, London aser Paris-i Kyiv nem item nok-nü agütsütsü atema mapa inyaktar, ta ashir. Yangji miimshia Europe nung yangluba components, equipments aser technologies tem Ukraine nem agütsütsü dena lir. Yangji French small-size TN-75 warhead, M51.1 submarine-launched ballistic missile dena lir," ta SVR ajanga sangdong nung ashi.

British aser French nungeri par tasa ya international law nung aibelenba lir ta angateta lir, mezüngbuba nung Non-

Proliferation Treaty, aser yangji alima rangben non-proliferation system samatsü tensa lir."

"Ibaji yongji anüolen linüktemi Kyiv nem Ukraine nunger yangluba nuclear nok-nü ama amshidaksütsü meranger," ta sangdong ajanga ashi.

"Ukrainian armed forces teka amshia Russia madak takok angutsü tejangraba asangsang akumtsü teimla mali ta Great Britain aser France-i kanga junga meteta lir," ta SVR-i ashi.

"Parnok iba inyakyim nungi jena aotsü teimla tamendak dak maka, kechiaser meilongi temai adoktsü miimshitsüsa kecha mali. Military, political aser diplomatic inyakyim nung nisung aikati par lenirtemi tapi agi inyaksangshiba nung alima rangben asoshi lendong lir ta angateta lir," ta Foreign Intelligence Service ajanga ashi.

Russia-i Ukraine amak tenzüker küm pezü ajungba bilemtetsü atema European lenir aika Mongulbarnep Kyib nung aliba train station tulubai aruba mapang ka nung iba sangdong ya agütsü. Lenirtem ya EU chief Ursula von der Leyen, aser Denmark, Estonia, Finland, Iceland, Latvia,

Norway aser Sweden nungi lenirtem alitsü.

Lenirtem mena aliba tayimtsü tem arütsü anasa Polish military airport nung mezüng anen aser iba sülen sepaitemi tanükba tesashi agüja Przemysl station-i anir ao.

EU tir temi sangdong ka agütsüba nung, "European Union-i maneni Ukraine aser par nübur nem yimdenren, senotsü, rongsen, nübu, mitkar aser diplomatic teyari agütsütsü," ta ashi.

Pakistan nung telungpurtemi police pongu tepset

Dera Ismail Khan, Tsüklai/February 24 (Agencies): Northwest Pakistan nung Mongolbarnü telungpurtemi mendanga atar police gari ka amakba sülen police pongu tepsetogo.

Pakistan nung telungpurtemi timtem agütsüba azüoktsü merangba den kidanger Afghanistan den arrtsü nung asendenshir mangatettep adoker aliba mapang tang iba lendong ya atalokogo.

Karak yimti nung telungpurtemi drone dena amshia paramilitary asem tepsetba sülen anogo ka lir Kohat yimti nung police tem ya mendanga atar makogo. Iba yimti ya Afghanistan den arrtsü nung lir.

"Telungpurtem aikti police patrol ka amak. Police tepsetba rongnung ketdangsür tejen ka densema liasü. Parnokisa gari ya rongtokja liasü," ta Kohat police otongdar kati ashi.

Police tem amakba ya tang tashi nung telok kati danga nangzüka mali.

Muslim nunger temeshi ita Ramadan tenzüka mapang Pakistan-i Honibarnü anüng ajanga Afghanistan kübok tesem balala maka liasü. Pakistan-i ashiba agi, tawa parnok amakba telungpur telok dak rangloker

parnoki tesem balala ya maka liasü. Tawa Islamabad nung pei temang nung bomb alenoker pokdaksür kati mosque ka poksatsüba den tesem balala nung sepaitem Afghanistan nung amendaker aliba kiralongrartemi tepseta arudar.

Kabul aser United Nations nati ashiba agi, Pakistan-i tesem balala amakba mapang civilian-a 13 tepseta liasü.

Islamabad-i ashiba agi, item kiralongrartem nem Afghanistan nung tejenokdak agütsür, kong nungi parnoki tasa asa-a arrtsü adener Pakistan kübok tesem balala amaker.

"Pakistan-i Afghanistan amakba ya kiralongrar inyakyim ka lir kechiyong parnoki Afghanistan telung nung civilian tem dak rangloker jenjang agi, koba Afghanistan sovereignty anema lir," ta Taliban sorkar otongdar Zabihullah Mujahid-i Mongolbarnü ashi.

Afghanistan den arrtsü nung aliba district tem ya mapang talang ka nungi Islamist telungpur teloktem tamendakdak lir. Telungpurtem rongnung Pakistani Taliban, shirnok dang Tehreek-e-Taliban Pakistan ta ajar parnoka densema lir. Iba telok ya 2007 küm nungi Pakistan sorkar den rara arudar.

KHRISTAN OSANG : Tapak 5 nungi...

Northeast India nung Khristanpur...

Assam nung right-wing telok temi Khristanpur tribal nisungtem "delisting" asütsü amokmerena 2024 Healing Practices Act ya mashi lenman nung amshia sarasadem sentong azüokba nung amshir, ta AICU-i ashi.

Taoba küm December ita Catholic school ka nung inoka aliba Christmas crib aser ki naro raksatsü, ta Dayal-i ashi.

AICU national president Elias Vaz-i state ketdangsürtem dang tamangba yimsü tsütsü kin tilatem kumzüka ayutsü, ochi obendang agütsütsü aser yimjung yangertsü ayongzüka liasü.

"Constitution nung shia aliba ama senso ajunga tamangba yimsü temeden sadema amshidaksütsü state

administration mapa lir, aser kin tilatem, talisa Khristanpur temenen ama kumdaksüba nungi nokdangtsüla," ta Vaz-i ashi.

India indang northeast nungya Arunachal Pradesh, Assam, Manipur, Meghalaya, Mizoram, Nagaland, Tripura, aser Sikkim lir, aser yangji kin aser tamangba yimsü telemsa balala alir.

State kar nung Khristanpur timba aser school healthcare facilities aser loktu tenzüka nung tesendaktep jenti lir.

AICU-i Ato Kilonser Narendra Modi dangia Arunachal law repringshitsü aser mepetmesü nungi jenbua alitsü asoshi jembishinü akatsü ayongzüka tezüluba nung agütsüogo.

GOVERNMENT OF NAGALAND
DIRECTORATE OF TECHNICAL EDUCATION
NAGALAND, KOHIMA

NO.DTE/ESTT-2/5/2016-17 Dated, Kohima the February, 2026

NOTIFICATION

Applications are invited from interested In-Service candidates fulfilling eligibility criteria specified below for admission to the Degree Module course at North Eastern Regional Institute of Science & Technology (NERIST), Itanagar.

Sl.No	Particulars	Requirements/ Criteria
1	Branch/ Field	Electrical Engineering/ Mechanical Engineering
2	Duration	3 years course
3	Minimum Qualification	3 years Diploma with minimum 60% pass percentage from the institute recognized/Approved by AICTE.
4	Maximum age	40 years (45 in case of SC, ST and PH) as on 1 st August 2026.
5	Certificate of Undertakings	From the concerned Department that the candidate shall be sponsored for 3 years.

Selection shall be made strictly on the basis of academic performance. Last date for submission of complete application along with all relevant documents to the **Directorate of Technical Education is on or before 15th March 2026.**

(Er. VIPULHOU LHOUNGU)
Director

Mayweather aser Pacquiao na September ita asayashitsü



Tsüklai/February 24, 2026 (Agencies): Floyd Mayweather aser Manny Pacquiao na September ita Las Vegas kübok Sphere nung professional asaya ka asayashitsü, ta asayar aser promoter temi Hombarnü metetdaksüogo. Iba asaya ya Netflix nung sayutsü.

Iba asaya ya Mayweather asaya nungi anener aliba meyipa arur asayaba mezüngbuba asaya aser Sphere nung mezüngbuba professional boxing asaya ka asütsü.

Mayweather, shibai pa indang professional career nung asaya 50 nung khendanga tamakok mongui

asaya lir, pai 2015 küm Pacquiao koka liasü. Iba asaya nem ya "Fight of the Century" ta nungja agütsü, saka imlaba ama jangrademabo masayatet.

Iba asaya pay-per-view agi USD million 4.6 aazük aser asaya ajanga USD million 72 aazüka liasü. Tena asaya ya MGM Grand Garden Arena nung asaya liasü.

"Ni Manny den kehnbo asayaogo aser kokogo. Tanga result kasa dang asütsü," ta Mayweather-i ashi.

Kasa mapang nung Pacquiao, shibai knockouts agi asaya 39 akokba densema asaya 62 akokba den asaya 8 nung tamakok aser asaya 3

draw ser lir, paia Mayweather nem pa indang career nung mezüngbuba tamakok agütsütsü temulung lema bilemba lemsatepogo.

"Ni Floyd pa indang career nung asaya ka nung tamakok ngur lidaktsüner aser shibai pa akok aji teti bilemtedaktsüner," ta Filipino nung boxer yagi ashi.

Iba asaya ya Netflix nung alima ajunga nung subscriber million 325 dak tema dang sayutsü.

Iba streaming platform nung tongtibang asaya aika sayuogo, kong Jake Paul aser Mike Tyson na asayaba densema lir. Iba asaya repranger ya million 108 liasü.

Barcelona-i Norwich nungi Tavares alizükogo



Tsüklai/February 24, 2026 (Agencies): Spanish club Barcelona-i Norwich City academy nungi asayar Ajay Tavares alizükogo.

Arishi küm 16 taina asayar ya European club aikati alizüktsü tejangraba liasü, saka tang Barca nung denogo, ajisüaka Norwich pa atema tenangzüktepba yangluba dak sendakba nung osang tejangja magütsü.

Tavares, shiba mezüngbuba Norwich nung under-12 jenjang nung dena liasü, pa arishi küm 15 asüba mapang pre-season nung Dutch club Volendam den asayadang first-team nungi substitute ama asaya, ajisüaka pa senior jenjang nung asayamung balala nung khen danga asaya mali.

"Ajay amala sempet tajung aketba academy asayar ka oadokba agi onok mepelar, saka

kasa mapang nung nema-a kanga adanger," ta Norwich sporting director Ben Knapper-i ashi.

Tavares tatemsa Norwich indang under-18 team nungi Chelsea den January 31 nü Colney nung asaya liasü.

"International jenjang nung pa England tenüng nungi under-15, under-16 aser under-17 jenjang nung asayaogo aser pai maneni club aser linük atema tongtibang shilem agitsü ta onoki tamang akar," ta Knapper-i shisem.

Pa ya Barcelona-i English football nungi alizükba mezüngbuba arishi küm 16 tain asayar masü.

2019 küm Louie Barry West Bromwich Albion nungi Braca nung aden saka pa taruba küm Aston Villa-i meyipa ao.

Barcelona-isa, arishi küm 18 tain Marcus McGuane Arsenal nungi anir ao aser pa B team nung dena liasü.

McGuane ya 2020 küm England-i meyipa arua Nottingham Forest nung aden aser iba sülen pa Oxford United, Bristol City aser Huddersfield Town nungi asayaogo.

ICC Women's T20 World Cup 2026 June 12 nü tenzüktsü

Tsüklai/February 24, 2026 (Agencies): International Cricket Council-i ICC Women's T20 World Cup 2026 mapanglem Mongolbarnü sangdongogo.

Taküm iba asayamung ya England nung June 12 nungi July 5 tashi asayatsü, kong team 12 takok marok atema toktepba angutsü.

Hosts England team mezüngbuba asaya June 12 nü Sri Lanka den asaya-a iba asayamung tenzüktsü. Asayamung ya July 5 nü Lord's Cricket Ground nung final asayaba sülen tembangtsü.

India team-a iba asayamung nung mezüngbuba asaya Pakistan den June 14 nü Edgbaston nung asayatsü.

Taküm iba asayamng nung team timba toktepba angutsü. Bangladesh, Ireland, Scotland aser Netherlands nung Nepal nung qualifying tournament asayaba sülen qualify süogo aser parnok defending champions New Zealand, iba asayamung trokben koker aliba Australia team, 2016 champions West Indies, hosts England, ODI world champions India, Pakistan, South Africa aser Sri

Lanka nung den asayatsü. Iba asayamung atema Group A nung Australia, India, Pakistan, South Africa, Bangladesh aser Netherlands densema lir.

Group B nung England, New Zealand, West Indies, Sri Lanka, Ireland aser Scotland ata lir.

ICC CEO Sanjog Gupta-i asayamung atema mapanglem sangdongba ya iba asaya asoshi kanga tongtibang mapang ka lir ta ashi.

"Iba asayamung tongtibang ya masaya tsüngda mapanglem sangdongba ya alizüng tongtibang ka lir," ta Gupta-i ashiba den ICC-i tetsür cricket agüja inyakdar, kong team timba anioka asayadaktsüba, lenmang tajungba küma yanglushitsüba, production jenjang ajungkettsüba aser commercial maangka timba agütsüba densema lir, ta shisem.

Paisa, tawa international asayamungtem ajanga tetsür asaya ajungketba nung teyari agütsüogo aser taruba asayamung yagi iba asaya alima ajunga nung tali nungtuguba kümdaktsütsü imlar, ta ashi.

Morocco captain Saiss international asaya nungi anisüngzüker



ajanga ashiba agi, ken o kanga junga asadanga sülen iba telemetba ya agiogo, koba temela masü asü.

"Morocco tola semer asayaba aser team captain akümba ya kü indang career nung tetushi tulutiba asütsü," ta pai zülutsü.

"Iba tola asembashia ni khuret angatet, saka ajak dak alia iba ya tebang agi rasa ashitsü makokba nemadangtsü mapang ka liasü," ta paisa shisem.

Pa yiruba ajanga ita 18 masayai lir December ita AFCON nung asaya liasü. Pa lenisüba nung par linük team 2022 World Cup semi-final tonga liasü.

Taküm World Cup asayatsü ita asem anunga lia Saiss asaya nungi anisüngzüker. WC nung Morocco team Brazil, Scotland aser Haiti den asayatsü ata lir.

"Ni nenok atema number one supporter asütsü," ta pai ashi.

"Ni national team toktsür saka ni teti 'Lion' ka asütsü."

International asaya nungi anenaka Saiss Qatar Stars League club Al Sadd nungi maneni asayatsü.

Tsüklai/February 24, 2026 (Agencies): Morocco captain Romain Saiss-i Mongolbarnü sangdong ka ajanga pa international football asaya nungi anisüngzüker sangdongogo. Pa ashiba agi, iba ya pa taküm nung chapter tajungtiba ka shibangber lir.

Africa Cup of Nations nung yiruba densema mapangshia yiruba ajanga Saiss-i iba telemetba agia liasü. Africa Cup of Nations nung nung pa Comoros den mezüngbuba asaya nung minute 18 asayaba sülen yiruba ajanga melena liasü.

Arishi küm 35 tain taoba mapang Angers aser Wolverhampton Wanderers centre-back yagi social media

BILEMDANGANG

"Temetetba ajak peisasa pei metetba nungi tenzükter."